

Nalog supervizora kojim se ukidaju entitetski zakoni na području Brčko Distrikta i proglašava prestanak pravnog značaja međuentitetske granice u Distriktu

Sukladno stavcima 8, 11, 13 i 37 Konačne odluke za Brčko od 5. 3. 1999. godine, koju je donio Arbitražni tribunal za spor oko međuentitetske granice u oblasti Brčkog, kojima su supervizoru za Brčko date ovlasti da vrši mandat na način propisan Konačnom odlukom;

Imajući na umu da se stavcima 11 i 39 Konačne odluke (a) predviđa ukidanje pravnog značaja međuentitetske granice na području Brčko Distrikta; (b) nalaže Distriktu i supervizoru da poduzmu radnje ka ukidanju pravnog značaja međuentitetske granice, koje, da bi se to ostvarilo, zahtijevaju da se entitetski zakoni koji se primjenjuju u Distriktu zamijene zakonima Distrikta koji se primjenjuju na obje strane međuentitetske granice; i (c) supervizoru povjerava obveza da proglasi završetak ovog posla i prestanak pravnog značaja međuentitetske granice;

Imajući u vidu da su, sukladno ovim stavcima, Povjerenstvo za reviziju zakona u Brčkom, Vlada Brčko Distrikta i Skupština Brčko Distrikta ulagale zajedničke napore na izradi i usvajanju zakona kako bi zamijenili one entitetske zakone koji u Distriktu i dalje imaju pravni značaj;

Imajući nadalje u vidu da je ovaj posao u najvećoj mjeri, ali ne potpuno, završen, i približno sedam godina nakon donošenja Konačne odluke međuentitetska granica i dalje ima pravni

značaj na području Brčko Distrikta, tako što institucije Distrikta još uvijek različito primjenjuju pojedine zakone Republike Srpske i Federacije Bosne i Hercegovine sa jedne odnosno druge strane nekadašnje međuentitetske granice;

Pored toga imajući u vidu da u mnogim oblastima u kojima entitetski zakoni i dalje važe u Distriktu, ne postoji potreba, ili ne postoji prijemka potreba, za zakonima, i da ti entitetski zakoni, bar za sada, mogu biti ukinuti bez posljedica a da ne budu zamijenjeni odgovarajućim zakonima Distrikta;

Smatrajući da su, sve dok ne budu donijeti novi zakoni Distrikta kojima će biti zamijenjeni ukinuti entitetski zakoni, postojeći zakoni Distrikta, države i Socijalističke Republike Bosne i Hercegovine koji se primjenjuju u Distriktu, dovoljni da na adekvatan način reguliraju oblasti djelovanja obuhvaćene entitetskim zakonima koje ovaj nalog ukida;

Ovim nalažem sljedeće:

1. Ovisno od onoga što slijedi u narednim stavcima ovog naloga, svi zakoni Federacije Bosne i Hercegovine i Republike Srpske ("Entiteta"), i svih institucija koje su sastavni dio bilo kog Entiteta, odmah prestaju da imaju pravno dejstvo u bilo kom dijelu Brčko Distrikta Bosne i Hercegovine. U mjeri u kojoj su isti na snazi u Brčko Distriktu, svi takvi zakoni se ukidaju danom izdavanja ovog naloga supervizora.

2. Entitetski zakoni navedeni u Aneksu ovog naloga supervizora biti će odmah preuzeti kao zakoni Brčko Distrikta, sa istovjetnim tekstom osim što:

i. će se isti primjenjivati na cijelom području Brčko Distrikta, sa obje strane nekadašnje međuentitetske granice;
i

ii. će institucije Distrikta navedene u Aneksu ovog naloga supervizora biti zadužene za vršenje ovlasti i odgovornosti

koje su ranije pripadale entitetskim institucijama prema odredbama tih zakona.

Ovi novi zakoni biti će zakoni Brčko Distrikta, a ne zakoni bilo kog od Entiteta. Isti će ostati na snazi sve dok ne budu izmijenjeni ili ukinuti od strane Skupštine Brčko Distrikta.

3. Shodno stavku 39 Konačne odluke, međuentitetska granica prestaje da ima pravni značaj na području Brčko Distrikta Bosne i Hercegovine.

i. Ovisno od stavaka 6 i 7 ovog naloga i osim u slučajevima propisanim u važećem zakonu Brčko Distrikta Bosne i Hercegovine koji je sukladan Ustavu, niti jedan postupak bilo kog od Entiteta ili bilo koje institucije koja je sastavni dio istih, poduzet na dan ili nakon dana izdavanja ovog naloga, neće imati nikakvo pravno dejstvo u Distriktu ili bilo kom dijelu istog.

ii. Bilo koji postupak bilo koje institucije Distrikta ili države, poduzet nakon dana izdavanja ovog naloga, koji za namjeru ili efekat ima:

a. da učini da nekadašnja međuentitetska granica ima pravni značaj na području Distrikta ili stvaranje bilo koje druge zemljopisne linije na području Distrikta sa sličnim značajem;

b. podjelu Distrikta na bilo kojoj etničkoj osnovi; ili

c. da učini Distrikt ili bilo koji dio istog dijelom bilo kog Entiteta;

biti će ništavan.

4. Stavci 1 i 3 ovog naloga supervizora imaju trajno dejstvo. Ovi stavci ne mogu biti izmijenjeni, ukinuti ili na drugi način modificirani, osim nalogom Arbitražnog tribunala za spor

oko međuentitetske granice u Brčko Distriktu ili novim nalogim supervizora, čak ni nakon prestanka supervizije ili nadležnosti Tribunala.

5. Ništa iz ovog naloga supervizora neće imati uticaja na bilo koje pitanje u vezi sa statusom ili validnošću koje na području Distrikta ima:

(a) bilo koji zakon Socijalističke Republike Bosne i Hercegovine ili Socijalističke Federativne Republike Jugoslavije koji je na snazi na području Distrikta na dan izdavanja ovog naloga (bilo da se takvi zakoni u Distriktu primjenjuju na osnovu toga što su preuzeti putem entitetskih zakona, ili po bilo kom drugom pravnom osnovu), pod uvjetom da Skupština Brčko Distrikta može odlukom ili zakonodavnim aktom poništiti bilo koji takav zakon, u cjelini ili djelomično; ili

(b) bilo koji zakon koji je usvojila Skupština Brčko Distrikta, ili bilo koji zakon koji je donio Parlament Bosne i Hercegovine, pod uvjetom da se takvim zakonom u bilo kom od ovih slučajeva ne krše odredbe stavka 3 (b) ovog naloga.

6. Ništa iz ovog naloga supervizora neće imati utjecaja na pravne obveze nastale po osnovu ili kao posljedica bilo kog pravnog sporazuma između Distrikta i Entiteta sklopljenog prije dana izdavanja ovog naloga supervizora.

7. Ništa iz ovog naloga supervizora neće imati utjecaja na zakone i propise koji su na snazi u Brčko Distriktu na dan izdavanja ovog naloga supervizora a koji se odnose na:

(a) način na koji se u Distriktu upravlja željezničkim uslugama, željezničkim vozim parkom i pripadajućom infrastrukturom, te kako se isti održavaju;

(b) rad Ekonomskog fakulteta Brčko u Distriktu, sve dok je dio Univerziteta u Istočnom Sarajevu;

- (c) obveze uplata doprinosa u entitetske mirovinske fondove, i prava na primanje isplata iz istih;*
- (d) pružanje poštanskih i telekomunikacionih usluga na području Distrikta;*
- (e) status koji imaju i prava koja ostvaruju invalidi rata i porodice palih boraca u Distriktu; ili*
- (f) predškolsko obrazovanje i odgoj.*

Međutim, bilo koji takav zakon ili propis može biti poništen odlukom ili zakonodavnim aktom Skupštine Brčko Distrikta. Nijedan takav zakon ili propis ne može se primjenjivati ili sprovesti ukoliko diskriminira ili se koristi da diskriminira građane Brčko Distrikta na osnovu etničke pripadnosti, entitetskog državljanstva ili prebivališta u Distriktu ili bilo kojem njegovom dijelu. Nijedan novi entitetski zakon ili propis u svezi sa gorepomenutih šest oblasti neće imati bilo kakvo pravno dejstvo u Distriktu.

8. Ovaj nalog supervizora stupa na snagu odmah i biti će bez odlaganja objavljen u Službenom glasniku Brčko Distrikta. Vlada i Skupština Brčko Distrikta poduzeti će sve potrebne mjere da osiguraju implementaciju istog.

Susan R. Johnson
supervizor za Brčko
zamjenik visokog predstavnika

Aneks naloga supervizora od 4. 8. 2006. god.

koji predstavlja spisak zakona Entiteta koji će biti preuzeti kao zakoni Brčko Distrikta i koje će institucije Distrikta implementirati od dana izdavanja ovog naloga supervizora

1. Zakon o proizvodnji i prodaji lijekova (Službeni glasnik RS, 19/01): poglavlja VIII i IX – Odjel za javnu sigurnost; sva druga poglavlja – Odjel za zdravstvo i ostale usluge
2. Zakon o elektroenergetskoj inspekciji (Službeni glasnik RS, 12/93) – Odjel za javnu sigurnost
3. Zakon o inspekciji rada (Službeni glasnik RS, 8/97) – Odjel za javnu sigurnost
4. Zakon o tržišnoj inspekciji (Službeni glasnik FBiH, 2/95) – Odjel za javnu sigurnost
5. Zakon o sanitarnoj inspekciji (Službeni glasnik RS, 14/94) – Odjel za javnu sigurnost
6. Zakon o mjerama za unapređenje stočarstva (Službeni glasnik RS, 10/98) – Odjel za poljoprivredu
7. Zakon o zaštiti stanovništva od zaraznih bolesti (Službeni glasnik RS, 10/95) – Odjel za zdravstvo
8. Zakon o vodama (Službeni glasnik RS, 10/98) – Odjel za poljoprivredu
9. Zakon o šumama (Službeni glasnik Tuzlanskog kantona, 10/99) – Odjel za poljoprivredu
10. Zakon o lovstvu (Službeni glasnik RS, 13/94) – Odjel za poljoprivredu
11. Zakon o deviznom poslovanju (Službeni glasnik FBiH, 36/98) – svi relevantni odjeli Vlade
12. Zakon o prometu eksplozivnih materija i tečnosti (Službeni glasnik RS, 16/96) – Odjel za javnu sigurnost
13. Zakon o porezu na imovinu (Službeni glasnik RS,

38/03) – Uprava prihoda Distrikta i Porezna uprava Distrikta

Kasnijim dopunskim nalogom supervizora ovom Aneksu može biti dodano još točaka dok supervizija bude na snazi, ali se ni u kom slučaju ne može dodavati još točaka nakon završetka supervizije u Brčko Distriktu.